

# 2 Yohanes

## Yohanes arye, bitinye talak sekeipsuk yupu

Abuku sekuk deiyoknye bira, Yohanes ulamuk. Yohanes ara, Yesus arye wibuka deibuk mapu, sik 12 nang kan-kan ton ulamuk. Yohanes arye, asurat ap, bitinye tonap sekuka, asurat winilye deice el si deibuk. Asurat ara, bitinye ning sekdeibuk. Tonda, Yohanes arye, Injil Yohanes ap, buku Wahyu ap sekeipsuke.

Yohanes ara, Asia tam noutamak peterebuka balamukce, Efesus mutuku ton binmoka anya arye, asurat ara, Asia tam noutamak bukni, Efesus mutuku ulamuk talak arye, sekuka dopkwetebuk buk, Asia tam ninye bobuka balamikce, elilamik.

Yohanes arye, asurat sekuk talak ara, Yesus el laka teleb yupu peterelban nang ap, tonda Allah yupu nirya peteren deiyok nang ap, arye, ayupu dobuka yuk mutuku nirya peterepra balamik. Winilamik talak noutamak ara, sik balamik mutuku ninye arye, apeteren nang sik patan ning melibuka arilamik. Allah el dipkoprop yupu peterena deiyok nang arye, aning ulamik touk, sik tilila yupu peterena nang babye, atonun winilamik ulamik. Aning ati ara, Yohanes arye, ‘Yesus diba tenenyak ninye, tilila yupu peteren nang sik dam yakibuk, mankau kanye bobuka, sik patan ning ati melibuka aribicak’ tenen, yupu sekuk. Ati, Yohanes arye, “Tilila yupu peterena nang nirya, sik dam yakce ura, talye kanye bobuka, kum kekenamlulume. Sik nyanyak yupu nirya ara, moubuka kekepmumce, ‘Tek do, tilila do’ tenen, moupra kekenamlulume. Teleb ning, kekenamlulume. Tilila ning ara, kekena meme,” nyabuk.

---

### Asurat deiyok kouna ati, nyabuk yupu

<sup>1</sup>Na anggung deiyoknye birye, anggung ti ayupu seksine. Anggunda Allah arye, melyamsukba, diba tenebuka, Allah yupu aik neika wekelulum nang nirya babye, ura anggung diba tenelulum nang babye, ati ayupu seksine. Na ni, Allah el dipkoprop yupu talibuka uniryne, kanye delisunune. Tonda yuk mutuku nang bukni, Allah nyasulul yupu, el dipkoprop yupu ati, kanye delinyak nang nirya arye, anggung ti bico

tenenyake. <sup>2</sup>Allah el dipkoprop yupu diba tenebuka talimunya arye, el yupu, nun talima noutam tuba usulule. Usilye ati, el yupu diba tenebuka, fia talina uk ulamibyop ura, el yupu nun talima ak fia unamsile. Anggun ti kanye delina ara, naryuk kume.

Aning ati, anggun ti kanye delina ara, na babye, ninye mutuku-mutuku nirya babye, Allah yupu diba tenebuka talinyak ninye nirya babye, nun nirya arye sik ti kanye delinyabe. <sup>3</sup>Nun teleb ubuka ubya deice arye, kum melisulul bukni, Allah el kanye aryuk bico tenepsilirye, talye melisulule. Winisilirye nun kanye imun ning ap, nun patalamsilye ning nirya ap, disulula ati, aning nirya patapsilye touk, bico tenebuka melisulule. Anirya winisulula deice arye, nun ap, yuk nang ap, ura Allah el bidamnye ap, malye kanye bona kumce, teleb ubuka ansinibuka unyabe.

Anyapman ning nirya ara, nun Ni Allah ap, el Mi Koprop Yesus Kristus ap, arye fia arisururake. Aripsirikce ura, dopropbibirye teleb ubuka diksukumuk una ap, bico tenebuka melilana ap arye, unamabe. <sup>4</sup>Yuk nang arye, anggun ti nyapnike. “Nun Ni Allah arye, ‘Wininamlulume,’ nyapsuk touk, anang nirya kum bukni, anggun kan-kan noutam arye, ton ninye ara, Allah el dipkoprop yupu kekebuka diksukumuk unyake,” nyapnike. Nyapnikba, kekepsa ati, na kanye fia teleb deipse.

<sup>5</sup>Winira, yuk yupu ton nyapnune. Anggun diba tenelulum ninye ati kanye delisunune. “Wininamlulume,” nyabuka seknusin yupu ara, winiryuk ning kume. Nun nirya diba tenebupu talak arye, anoutam talak nirya, ayupu akunum kekenyabe. Ayupu ara ani. Nun nirya arye, bico tenebuka melilana uk unamabe nyapne. <sup>6</sup>Ara, bico tenebuka melilana uk unamap nyapman ning ara, ani. Yatato una do, kume. Ara, Allah arye, “Wininamlulume,” nyapsuk yupu nirya kekebuka dobolbana uk unamabe. Yuk ton kume. Allah arye, “Wininamlulume,” nyasulul yupu ara aning uk ulule. Ati, anggun diba teneplum talak arye kekelamlum touk, winitalak tuba anggun nirya arye, bico tenebuka melilana uk unamlulume.

<sup>7</sup>Tilila yupu nyanyak nang weik akunum mutuku-mutuku nirya peterlbanyake. ‘Sikke tilila yupu diba tenebikirye, talye bisik dobolyanganamsiak’ tenen, peterlbanyake. Tonda anang arye, ‘Yesus Kristus ninye nong atonun ubuka akunum yayuke’ tenen, diba kum tenenyake. Ati ayupu diba tenebuka kum peterenyake. Anang ulamak ning atonun wininyak nang nirya ara, sikda tilila nang unyake. Ton, ‘Yesus Kristus ap, el ulul ning nirya ap, bisiptiby’ tenen, unyake, nyapne.

<sup>8</sup>Ati anggun nirya kanye moupnamlulume. Anggunce teleb fil dadolamunye ura, Allah arye, ‘Menenga ning aripnamsile,’ tenebuk ning ap, kanye deibuka erepdeipsilirye, im deice teleb ning aripnamsil ning ap, ara ‘Kum dasilyak’ tenen, anggun nirya moupnamlulume. Ara, ‘Allah arye, teneamuk ning nirya aripnamsil’ tenen, fia mouplulume, nyapsine. <sup>9</sup>Yata nang do, nirya, sikce, Yesus Kristus elce peterelamuk

yupu batakuka, elce kum peterelamuk ning bukni, yuk talye yupu dukdongobuka peterenyak ninye nirya ara, Allah sik talima ak kum ulule. Aning kumop ura, yata nang do, nirya, Kristus peterelamuk yupu uk talibuka, dobolbanyak ninye nirya ara, nun Ni Allah ap, el Mi Koproprop Yesus ap, anggun talima ak ururake, nyapne.

<sup>10</sup>Yata nang do, nirya, Kristus peterelamuk yupu kum bukni, sik bidamnang tenenyak ning talibuka, anggun dam peterelyakcop ura, anang ati, “Telebe, nun aik neika bukuka, kwaning dinamabe,” nyabuka kum yukunamlulume. Atilila nang yupu talibuka, anggun ap, anggun aik kopropa ap kum wekenamlulume. <sup>11</sup>Ara, atilila yupu peterenyak nang ati, “E, na ka telebe, neika bukname,” nyabuka, yukulolulnye bira, ayupu nyabuka melibuka ulya deice arye, elce ton, atilila peteren nang ap, ansinibuka malye fil donyaka ati, nyapne.

<sup>12</sup>Ura na arye anggun ti, yupu weikanun ton seksitinye bukni, kertas ap, sekna ning ap deice arye, sekuka kum nyapnusine. Aning kume, na ara, ‘Se, winipnamne,’ tenenun ara, nyapnune. Ara, ‘Sik ap, na ap, nun kanye fia deipdatibye,’ tenen, ‘Uruna ati, na yanyop ura, mening dam aulamtibirye, yupu sisikilalamtibye,’ tenenune. ‘Winiptinyop ura, kanye fia deipdatibye,’ tenenune. <sup>13</sup>Ati asukum uk deipne. Allah arye, melyamsukba, Allah diba tenebuka, amutuku ubirye, el yupu kekenyap nang, nunce anggun nirya ati, telebe nyapsiabe. Nunce anggun ti, ‘Nun weitcapu atouk unyake,’ tenesinyabe.

Telebe, na Yohanes arye akunum nyapne.